

hukum Tuhan yang tertentu dan ditentukan oleh Allah dan Rasul-Nya.

Marilah! *Ikhwān al-Muslimīn* kita bangkit bersama-sama di dalam sempena menyambut merdeka ini! Marilah kita membuang selimut yang telah diselimutkan oleh penjajah untuk kita melupakan tanggungjawab kita kepada Tuhan yang memerintahkan kita supaya berusaha menegakkan kalimah Tuhan di mana kita berada dan berusaha membangunkan sebuah negara bahagia yang dikurniakan Tuhan – *baldatan tayyibatan wa rabbun ghafūr!*

Marilah kita melagang suatu baris kaum Muslimin yang kuat supaya dapat kita bersama-sama menyampaikan perintah-perintah Tuhan! Bekerjalah masing-masing di dalam tiap-tiap bahagiannya! Yang ahli dalam iktisad bekerjalah di dalamnya; yang ahli dalam pelajaran bekerjalah dengannya; dan seterusnya tiap-tiap ahli itu hendaklah memberikan tenaga dan usahanya sedang semua tumpuan usaha itu bukan untuk pangkat dan kemuliaan, dan bukan untuk perolehan tetapi semata-mata untuk menunjukkan bakti kita kepada Allah, Allah yang menjadikan kita, Allah yang kita sembah dan kita puja!

Bangkitlah wahai *Ikhwān al-Muslimīn* untuk menegakkan kalimah Tuhan dalam masa kita menyambut hari yang bersejarah ini, hari terlepasnya kita daripada penjajahan Barat! Berjihadlah saudara-saudara dengan harta, dan diri saudara-saudara kepada jalan Allah! Inilah yang dituntut! Inilah pengorbanan yang dikehendaki!

* * *

Sudah Lepaskah Kita daripada Penjajahan?

Di dalam menyambut Hari Kemerdekaan 31 Ogos 1957 ini janganlah hendaknya kita berasa bahawa kita sebenarnya telah terlepas dari penjajahan! Sebenarnya kita masih di dalam penjajahan lagi! Kita baharu sahaja

terlepas daripada sebahagian penjajahan siasah tetapi masih terletak di dalam penjajahan ekonomi, di dalam penjajahan kebudayaan dan sebagainya yang masih kuat tapaknya bertapak di tanah air kita sendiri!

Kalau penjajahan siasah mudah kita menolaknya dan mengeluarkan mereka dari tanah air kita tetapi penjajahan ekonomi, pada hakikatnya, tidak dapat keluar bersama-sama dengan penjajahan siasah di tanah air kita kerana tapak ekonomi yang ditanamnya di tanah air kita telah berurat berakar sehingga kita masih takluk kepadanya. Hal ini tidak akan dapat kita elakkan jika kita sendiri tidak melayakkan diri bekerja bersungguh-sungguh dengan bertekun bukannya sebulan dua tetapi selagi kita mencintai tanah air.

Demikian juga halnya dengan penjajahan kebudayaan! Kita telah banyak mengambil kebudayaannya dan adat istiadatnya dan untuk ini kita adalah sentiasa dijajah oleh mereka. Agama kita juga telah dijajah dengan menggunakan kekuasaan Raja-raja di dalam mana jika ada orang yang mencelikkan mata rakyat maka orang itu ditegah atau sekurang-kurangnya dihalang-halangi. Perkara ini sayugialah kita perhatikan bersama-sama supaya terjauh daripada segala halangan yang terbukti bahawa agama kita masih dijajah lagi kerana agama itu masih terletak di tangan Raja-raja yang menjalankan segala sesuatu mengenai agama menerusi penasihat-penasihatnya yang terdiri daripada ulama-ulama yang melebihkan usaha dalam melemahkan semangat rakyat daripada menghidupkan roh keislaman mereka.

Hal yang akhir disebut inilah, salah satu penjajahan yang digemari oleh penjajah dari dahulu lagi dengan menopengkan Raja-raja kita kerana mereka adalah lebih takut kepada kebangkitan agama dan mereka lebih memusuhi Islam daripada lain-lainnya semenjak terjadi Perang Salib beberapa kurun

dahulu. Sebab itulah wahai saudara-saudara *Ikhwān al-Muslimīn*! Bekerjalah kita untuk menghapuskan penajahan agama itu sehingga terdiri di dalam negeri kita ini Kementerian Agama yang khusus menjalankan usaha-usahanya dalam perkembangan agama dan pelajarannya – tidak menjadikan pelajaran agama itu suatu sambil-sambilan juga. Berjihadlah saudara – Jihad saudara adalah dituntut!

* * *

Sudah Lewat?

Menurut berita yang disiarkan baharu-baharu ini memberitakan bahawa Parti Nasional Indonesia (P. N. I) telah menyatakan bahawa mereka mengkehendaki adanya kerjasama yang rapat di antaranya dengan Masyumi dan *Nahdatu al-'Ulama'* untuk menghadapi perkembangan-perkembangan yang ada terutamanya atas kemenangan Komunis di seluruh Pulau Jawa, dan dengan kerjasama inilah dapat dijauhkan Indonesia daripada bahaya Komunis.

Pada masa-masa yang lampau, *Nahdatul 'Ulama'* dan P. N. I. memandang bahawa Masyumi adalah penghalang kemajuan dan perkembangan-perkembangan di Indonesia dan kerana itulah mereka mendampingkan dirinya untuk bekerjasama dengan Komunis lalu meninggalkan Masyumi. Perbuatan kedua-duanya bersahabat dengan Komunis itu adalah umpama orang bersahabat dengan ular – apabila ia berkuasa, ia akan menelan rakannya sendiri!

Sekarang kerana perbuatan-perbuatan itu, P. N. I. yang tadinya memandang pertubuhannya sebuah pertubuhan yang kuat, telah melihat bahawa dengan perbuatannya itu mereka sangkari sedang menjadi lemah dan akhirnya baharulah mengentepi bahawa perbuatan-perbuatannya bersahabat dengan Rusia dan kerajaan Komunis China itu dengan sendirinya telah menjadi sebab yang besar atas kejayaan Komunis di Indonesia.

Masyumi pada masa itu memandang tidak ada faedah yang

di dapat meletakkan duta-dutanya di Rusia dan China! Masyumi masa itu memberi pandangan bahawa meletakkan kedutaan-kedutaan Komunis di Indonesia ertinya tidak lain daripada menguatkan kedudukan Komunis sahaja sehingga akhirnya Presiden sendiri termasuk orang-orang yang pro-Komunis yang lebih mengutamakan Komunis daripada parti-parti Islam seperti Masyumi bahkan Presiden sendiri memandang Masyumi itu sebagai penghalang cita-citanya untuk berleluasa mengikut kemahuan nafsunya berkuasa di Indonesia.

Adakah kerjasama Masyumi yang dikehendaki mereka dapat menolong Indonesia daripada bahaya Komunis yang telah bertapak itu? Soalnya adalah jika P. N. I. mahu – berkorban iaitu memberi pengorbanan mendudukkan Dr Hatta sebagai Perdana Menteri dengan mengambil orang-orang yang disingkirkan oleh Presiden seperti Hamengku Buwono, Mohammad Natsir dan Syahrir serta seumpamanya; orang-orang yang jujur, memegang kementerian-kementerian dengan Presiden patuh kepada tadbir-tadbir mereka – berkata-kata mesti lebih dahulu diketahui oleh mereka – tidak boleh membuat sembahuna sahaja – dan menjadikan P. N. I. sebagai jambatan untuk Presiden berbuat sesukanya.

Mudah-mudahan keinsafan ini belum lewat masanya untuk memperbaiki kedudukan Indonesia pada masa yang akan datang. Janganlah hendaknya Masyumi terus menerus memberi pengorbanan tetapi orang lain tentunya wajib berkorban! Jauhkanlah diri dari orang-orang yang sesat-sesat. Mencari kedudukan kerana maslahat diri di dalam menghadapi musuh bersama iaitu Komunis. Orang-orang Islam di Indonesia mesti ingat bahawa jika Komunis berkuasa sudah tentu mereka akan dipotong seperti ulama-ulama Indonesia dipotong dan disembelih di Madiun dahulu. Beringat adalah lebih baik sebelum terjadi peristiwa Madiun yang kedua.